

fürwar / daß diser Mercurius so gut ist / als der so auß dem Gold gezogen wirdt / zu allen Wercken / dann ist Saturnus inwendig gut Gold / wie er dann in der warheit ist / so muß auch sein Mercurius so gut seyn / als der Mercurius von dem Gold / dann so ihr sollet auß dem Mercurio ziehen / so bedörffet ihr wol ein Jahr das Gold zuöffnen / ehe der Mercurius von Gold wirdt. Aber den Mercurium auß dē Saturno ziehet ihr in 14. tagē / vnd sind beyde gleich gut. Volt ihr ein Werck machen auß Gold alleine / so müßt ihr wol 2. Jahr arbeiten / biß ihr es vollendet / machet ihr aber ein Werck auß dē Saturno / dz vollendet ihr in 32. oder 30. Woche zum lengstē / vnd wenn sie beyde gemacht sind so sind sie beyde gleich gut.

Das sage ich euch beyder warheit / folget Gott dem Herzē / meine Kinder / fürwar Saturnus ist der Stein / welche die Philosophi nicht nennen haben wollen / dann so er genennet wurde / so wer die Kunst zu gemein worden / dann sein Werck ist kurz / vnd gehet mit kleinem vnkosten vnd geringer arbeit zu / darzu gar schlechte in den Handgriffen / alle die wunderbarlichen Parabolen / welche die Philosophi dunkel geschrieben haben / vnd geredt von einem Stein / von einem Nammen / von einem Ofen vnd einem Glas / ist alles Saturnus / dann man darff nichts frembdes darzu thun / dann allein das / daß vom ihm kompt / so mag auch keiner so arm seyn / er mag dises Werck vollbringen vnd zurichten / man kan den Saturnum wol mit geringer arbeit zu Luna machē / vnd auch mit ein wenig lenger zeit zu Gold bringē / nachmals kan man auch den Stein Philosophorum darauß machen.

Also ist nuhn in Saturno alles beschlossen / was vns von nöthen ist / dann in ihm ist der perfect Mercurius / vnd in ihm seind alle Farben so in der Welt / welche in ihm offenbar werden mögē / in ihm sind die auffrechten Farbē / Schwarz / Weiß vnd Rot / in ihm ist das gewichte / in ihm ist der auffrechte Leichnam / es ist vnser Saturnus vnd ☉. Eines menschē Aug kan kein imperfect Ding ertragen oder erleidē / das aller geringste nit / aber einer Bonē groß von dem Saturno rein vnd sauber geschabet / schlecht vnd rund ins Aug gesteckt / bringet keinen schaden / pein oder schmerzen / das mache daß es in eusserstem gleich perfect Gold ist / oder auch anders.